

आकाशवाणी

खबरां विजय बजाज कोला-पैहले खास-खास खबरां:-

1. केंद्री मंत्रिमंडल ने निर्यातकें लेई इक नमी दोआर आश्वासन योजना गी मंजूरी दिती ऐ, जेहड़ी भलेआं लौहके, लौहके ते दरम्याने दर्जे दे उद्यमें एम.एस.एम.ई सने निर्यातकें गी 100 फीसद दोआर दा आश्वासन प्रदान करदी ऐ।
2. केन्द्री मंत्रिमंडलै दिल्ली च होए दे कार बम्ब धमाके आले आतंकवादी हमले दी सख्त निंदा कीती ऐ।
3. भारती जनता पार्टी दिएं सांसद अपराजिता सारंगी होरेंगी महत्वपूर्ण बिलें दे संशोधन बारे संसद दी सांझी कमेटी दी अध्यक्ष नियुक्त कीता गेआ ऐ।
4. बिहार च होए दे असैम्बली चुनाएं दरान पाए गेदे वोटें दी गिनतरी कल कीती जाहग।
5. बोत्सवाना भारत च चीतें गी रक्खने लेई प्रोजेक्ट चीता दे तैहत अज्ज चीते भारत दे सुपुर्द करग।
6. फिडे शतरंज विश्व कप च ग्रैंड-मास्टर अर्जुन एरिगैसी, आर प्रज्ञानानंदा ते पेंटाला हरिकृष्णा अज्ज गोवा च राउंड-4 दे टाई-ब्रेक खेड्ढगडन। मुकाबले अज्ज दपैहरी 3 बजे थमां शुरू होडन।

Cabinet Decisions

केंद्री मंत्रिमंडल ने निर्यातकें लेई इक नमीं दोआर आश्वासन योजना गी मंजूरी दिती ऐ, जेहड़ी भलेआं लौहके, लौहके ते दरम्याने दर्जे दे उद्यमें यानि एम.एस.एम.ई सने निर्यातकें गी 100 फीसद दोआर आश्वासन प्रदान करदी ऐ। एह योजना 20 जहार करोड़ तगर दा बाददू दोआर-कर्जा प्रदान करग, जेहदे'नै तरलता ते भारत दी वैश्विक मुकाबलेबाजी आहली समर्थ बधग। कल नमीं दिल्ली च कैबिनेट ब्रीफिंग च सूचना ते प्रसारण मंत्री अश्विनी वैष्णव होरें दस्सेआ जे इस योजना दा मकसद भारत गी इक लक्ख करोड़ रुपें दे निर्यात लक्ष्य दा समर्थन करना ते आत्मनिर्भर भारत गी बढ़ावा देना ऐ। कैबिनेट ने सीज़ियम, ग्रेफाइट, रुबिडियम ते ज़िरकोनियम ज्नेह प्रमुख खनिजें च रॉयल्टी दरें दा संशोधन कीता ऐ। श्री वैष्णव होरें आखेआ ऐ जे एहदे'नै खनिज ब्लॉकें दी नीलामी गी बढ़ावा मिलग ते लिथियम, टंगस्टन ते नियोबियम ज्नेह महत्वपूर्ण खनिजें दे घरेलू उत्पादन च बाददा ते आयात घट्ट होग जेहदे'नै भारत च रोज़गार दे मते मौके पैदा होडन। केंद्री मंत्रिमंडल ने 25 जहार करोड़ रुपें शा मते दी लागत आहले निर्यात संवर्धन मिशन -ईपीएम गी बी मंजूरी दिती ऐ। एह इक प्रमुख पैहल ऐ, जेहदी घोषणा केंद्री बजट 2025-26 च भारत दी निर्यात सरबन्धी मुकाबलेबाजी समर्थ गी मज़बूत करने आस्तै कीती गई ही। श्री वैष्णव होरें दस्सेआ जे एह मिशन माली ब'रे 2025-26 थमां माली ब'रे 2030-31 तगर निर्यात संवर्धन च व्यापक, लचीला ते डिजिटल रूप कन्नै संचालित ढांचा प्रदान करग।

<><><><><><>

Cabinet Resolution

केन्द्र सरकार दे मंत्रीमंडल नै दिल्ली च लाल किले कश कार धमाके आहले आतंकवादी हमले च जान मुहाने आहलें प्रति डूंगा दुख ते बसोस जाहिर कीता ऐ। मंत्रीमंडल नै इन्हें बेदोसे लोकें दी जान जाने दे सम्मान च 2 मिन्टें दा मौन रखेया गया। मंत्रीमंडल नै सारे नागरिकें दे जीवन ते सुरक्षा दे प्रति सरकार दी वचनबद्धता गी फही पक्का कीता। बैठक मगरा मीडिया कन्ने गल्ल करदे होई सूचना ते प्रसारण मंत्री अश्विनी वैष्णव होरें आखेया जे कैबिनेट नै इस हमले च मारे गेदे लोकें गी श्रद्धांजलि भेंट कीती ते सौगी परोआरें प्रति संवेदना जाहिर कीती। मंत्रीमंडल नै इस घटिया ते कायराना हमले दी सख्त लफ्जें च निंदेया कीती। वैष्णव होरें आखेया जे मंत्रीमंडल नै आतंकवाद दे कुसै बी रुप गी बर्दाश्त नैई करने दी सरकार दी नीति ते वचनबद्धता गी फही पक्का कीता।

<><><><><><>

Jt Committee-Parliament

भारतीय जनता पार्टी दी सांसद अपराजिता सारंगी होरें गी 130में संविधान संशोधन विधेयक 2025 जम्मू-कश्मीर पुर्नगठन संशोधन बिल 2025 ते केन्द्र शासत प्रदेशों दी सरकार संशोधन विधेयक 2025 दी जांच आस्तै- संसद दी सांझी समीति दी अध्यक्ष दे तौर पर नियुक्त कीता गया ऐ। 31 मिम्बरें आहले पैनल च विपक्षी दलें दे 4 सदस्य- भाजपा दे 15 सदस्य- एन.डी.ए सहयोगी दलें दे 11 सदस्य ते इक नामजद कीता गेदा मिम्बर शामिल ऐ। लोकसभा बुलेटिन

च आखेया गया ऐ जे बी.जे.पी दे लोकसभा सांसद रवि शंकर प्रसाद- भर्तृहरी महताब- प्रधान बरुआ- बृजमोहन अग्रवाल- विष्णु दयाल राम- डी.के अरुणा- परषोत्तम भाई रुपाला ते अनुराग ठाकुर समीति दा हिस्सा न।

<><><><><><>

Jaishankar G-7 FMM

विदेशमंत्री डाक्टर एस. जयशंकर होरें कनाडा द नियागा च जी-7 विदेश मंत्रियें दी बैठक दरान ऊर्जा सुरक्षा ते महत्वपूर्ण खनिजें पर आउटरीच सत्र च हिस्सा लैता। बैठक दौरान डाक्टर जयशंकर होरें भारत दा नजरिया आलमी सतह पर पेश कीता। उनें निर्भरता घट्ट करने ते लचीलापन बधाने दी जरूरत दी बी गल्ल कीती। उनें आखेया जे अंतराष्ट्रीय सहयोग गै अगगे बढने दा इक मात्र रस्ता ऐ। एदे थवां पैहले विदेश मंत्री होरें इक होर बैठक समुन्द्री सुरक्षा ते समृद्धि पर आउटरीच सत्र च हिस्सा लैता- जित्थे उनें महासागर आहले नजरिए- हिंद प्रशांत सहयोग ते घरेलू बंदरगाह आधारित विकास दे माध्यम कन्ने समुन्द्री सुरक्षा प्रति भारत दे नजरिए गी रेखांकित कीता।

<><><><><><>

Bihar Counting

बिहार विधान सभा चुनां आस्तै पाए गेदे वोटें दी गिनतरी आहला कम्म कल होग। वोटें दी गिनतरी 38 जिलें दे 46 मतगणना केन्द्रें पर कीती जाग। 2 गेड़ च होए दे मतदान मगरा ई.वी.एम. गी सख्त सुरक्षा तैहत स्ट्रॉंग-रूम च रखेया गेदा ऐ। वोटें दी गिनतरी आहला कम्म कल बड़लै 8 बजे शुरु होग।

<><><><><><>

Botswana-Cheetahs

बोत्सवाना अज्ज प्रोजेक्ट चीता दे तैहत भारत गी चीतें सोपोंग। राष्ट्रपति द्रौपदी मुरमू ते उंदी बोत्सवाना समकक्ष डूमा बोको बशकार दपक्खी गल्लबात दे तैहत सांझी प्रैस-वार्ता दौरान एदी घोषणा कीती गई। प्रोजेक्ट चीता इक अनोखी पैहल ऐ- जेदा मकसद दहाके मगरा चीतें गी भारत च परतियै आनना ऐ। सितम्बर 2022 च बी नामीबिया थ्वां 8 चीतें गी भारत आनेया गया हा ते बोत्सवाना 8 चीतें भारत गी देग तां जे भारत च चीतें दी गिनतरी गी बढ़ाया जाई सकै। बोत्सवाना दियें राष्ट्रपति Duma Boko होरें आखेया जे एह समझौता दर्शादा ऐ जे दवै मुख्य पर्यावरण सरबंधी लक्ष्यें ते जैविक बन-सबन्नता गी बढ़ावा देने लेई इक्कै नैई भावना रखदे न। बोत्सवाना गी उंदे सहयोग लेई धन्नवाद करदे होई राष्ट्रपति मुरमू होरें आखेया जे भारत इनें चीतें दी खरी चाली दिक्खभाल करोग।

<><><><><><>

Srilanka Pakistan

इस्लामाबाद च होए दे जबरदस्त बम्ब धमाके दे बाद सुरक्षा कारणें दा हवाला दिंदे होई, इक ध्याड़े आहले त्रै क्रिकेट मैचें दी श्रृंखला लेई पाकिस्तान च मजूद केई श्रीलंकाई क्रिकेटरें वापस अपने मुख्य जाने दी गुजारिश कीती ऐ। इस धमाके च 12 लोक मारे गे हे। एहदे जोआब च, श्रीलंका क्रिकेट -एसएलसी ने खड्डारिएं दी गुजारिश गी मंजूर करी लैता ऐ पर उंनै तय कार्यक्रम दे मताबक श्रृंखला जारी रक्खने दा निर्देश दिता ऐ। दौनों टीमें बशकार इक ध्याड़े आहला

दुआ क्रिकेट मैच अज्ज रावलपिंडी च ऐ। श्रीलंका नै इस म्हीने दी 19 तरीक थमां पाकिस्तान च त्रै मुख्यें आहली टी-20 श्रृंखला बी खेड्ढनी ऐ। शुरुआत च एह् श्रृंखला पाकिस्तान, अफ़ग़ानिस्तान ते श्रीलंका दे बशकार खेड्ढी जानी ही पर पाकिस्तान दे कन्नै बन्ने पर संघर्ष दे बाद अफ़ग़ानिस्तान ने श्रृंखला खेड्ढने थमां नां करी दिती ही। हुन, ज़िम्बाब्वे गी त्रीये प्रतिभागी देश दे तौर पर इस श्रृंखला च शामिल कीता गेआ ऐ।

<><><><><><>

Israel Gaza Crossing

इस्राइल ने आखेआ ऐ जे उन्ने उत्तरी गाजा च मनुक्खी सहायता पुजाने लेई ज़िकिम क्रॉसिंग गी परतियै खोली दिता ऐ। रक्षा मंत्रालय दे तैहत सरकारी गतिविधियें दे तालमेल दफ्तरै आखेआ ऐ जे सहायता ट्रकें गी गाजा पट्टी च दाखला देने लेई क्रॉसिंग गी परतियै खोली दिता गेआ ऐ। एह्दे च आखेआ गेआ ऐ जे सब्बै आपूर्तियां इस्राइल दे लैंड क्रॉसिंग अथॉरिटी आसेआ व्यापक सुरक्षा जांच मगरा संयुक्त राष्ट्र ते अंतर्राष्ट्री संगठनै आसेआ पुजाइयां जाडन। संयुक्त राष्ट्र ते सहायता एजेंसियें रस्ता खोलने दा आह्वान कीता ऐ ते चेतावनी दिती ऐ जे उत्तरी गाजा इस जारी संघर्ष करी सबनै शा मता प्रभावित होआ ऐ। मनुक्खी समूहें दा आखना ऐ जे इस्राइल दे सख्त निरीक्षणें ते तय चीजें दी हद्द दे चलदे सहायता दी बंड आहला कम्म मट्ठी रफ्तार कन्नै होआ'रदा ऐ। गाजा दे अंदर बी बुनियादी ढाँचे गी व्यापक नुकसान ते लगातार असुरक्षा करी बंड दा कम्म चुनौतीपूर्ण बने दा ऐ।

<><><><><><>

Chess FIDE World Cup

FIDE शतरंज विश्व कप च ग्रैंड मास्टर अर्जुन एरिगेसी- आर. प्रज्ञानंदधा ते पेंटाला हरिकृष्णा अज्ज गोआ च राउंड-4 दे Tie Break खेडगंन। एह खेड दपैहरी 3 बजे शुरु होग। इसदे थवां पैहले अर्जुन नै हंगरी दे पीटर लेको गी जबरदस्त टक्कर दिती पर मैच ड्रां रेया- जिसलै कि प्रज्ञानंदधा ते रुस दे डेनियल बश्कार बी मैच ड्रा गै रेया। हरिकृष्णा नै इक गलती कीती ते अपने आपा गी मुश्कल च पाया- पर स्वीडन दे निल्सं ग्रैंडलियस खिलाफ ड्रा थवां बची निकलने च कामयाब रेह। दुई पेठा प्रणव वेंकटेश गी वोदिरबेक याकुबबोव नै बाहर करी दिता जिसलै कि लिएम क्वांग ले नै कार्तिक वेंकटरमन गी बाहर करी दिता।

<><><><><><>